

FAC nung Career guidance & counselling sentong agi



(Abelen) Fazl Ali College Mokokchung nung March 20, 2024 nü Career guidance and Counselling sentong ka ayongzüka agiba mapang ketdangsertem & (Achiji) Sachin Barwal, Academy Head of Imperial IAS Academy and ex-faculty of Adda 247, UPSC Guide, IAS and Network ajanga jembiba noksa nung angur.

Dimapur, Metsüremi/March 20 (TYO): Fazl Ali College, Mokokchung nung March 20, 2024 nü Career guidance & Counselling sentong ka agia liasü, kong Imperial Academy, Dimapur aser Kohima nungi counsellor tem shisalen sayur ama arua dena liasü.

Iba sentong ya Career Counselling Cell, FAC ajanga ayongzük.

Iba sentong nung shisalen sayur Sachin Barwal, Academy Head of Imperial IAS Academy and ex-faculty of Adda 247, UPSC Guide, IAS and Network ajanga

"Career in civil services" onük nung jembiba liasü.

Pai iba onük nung ajemdaker jembidang kaketshirtem asoshi linük nung UPSC aser NPSC dak rangloker civil services exam balala aliba indang rasaas ashi.

Kaketshir temi kechiba civil services ya career ka ama shiimtsüla ta asüba onük jembidang, civil services nung inyaker temi sobaliba aser yimsüyimpong, yimyakoya aser nisung balala ajurur aser lanur asüdang yongi jangratemtsü mapa agütsür, ta ashi.

Pai kaketshirtem dang civil

services exams balala nung yimya balala aliba indang rateta ashi aser tejangrar temi renemshitsüba indanga pai lemsatepa liasü.

Iba den külemei pai kaketshir nem tatidang asoshi renemtsü atema resources balala lemsatepa liasü.

Iba sülen counselling session ka tenzüka liasü, kong Imperial Academy Dimapur aser Kohima nungi Amongba, Senti Jamir aser Zuchamo nunger counsellors ama liasü.

Iba sentong nung FAC indang BA & B.Sc 6th semesters student dena liasü.

Kohima nung World Oral Health Day 2024 amung

Dimapur, Metsüremi/March 20 (TYO): Department of Health & Family Welfare ajanga Khedi Baptist Higher Secondary School Kohima nung March 20, 2024 bü "A Happy Mouth is a Happy Body" omen nung ajemdaker World Oral Health Day, 2024 nüngtem nung sentong ka ayongzüka liasü.

Iba sentong nung Dr. Meribeni Odyuo, Director (Dental) ajanga World Oral

Health Day omen rateta ashi aser Dr. Arenla Walling, Jt. Director & SNO (NTCP) ajanga moko achiba nungi temang aser nisung takum nung timtem agütsüba indang jembia liasü.

Iba sentong nung Rokokhono Miachieo, Headmistress, Khedi Baptist Higher Secondary School menden liasü aser Chathavituo Kesiez, Principal ajanga melepzung o jembia liasü.



Kitsubozou, Kohima nung kitsük-kirong lendong ajurur alir nem Indian Red Cross Society, Kohima District Branch ajanga March 20, 2024 nü teyari oset agüja liasü.

BAN aser ATMA tesendaktep akangshiogo

Dimapur, Metsüremi/March 20 (TYO): Business Association of Nagas (BAN) nungi ketdangsürtem aser All Tripura Merchant's Association (ATMA) chairman Ratan Saha aser general secretary Sujit Roy nungertem March 19, 2024 nü BAN Conference Hall, Dimapur nung senden ka mena liasü.

Nagaland aser Tripura tsüngta shishilempaba terenlok asoshi lenba-lenre bushitsü aser kati ka angatetepa lungjemer inyaktsü asoshi sapang ka ama iba senden ya ayongzüka liasü.

Ossetsüset aser resources

melentepa Nagaland aser Tripura ajangzüksü tangatetba tajung nung lir. State anaprongi kati-ka nüngdakba angateta yariteptsü iba senden nung jembia liasü.

Iba senden nung ATMA ajanga lapoktsü aliba Sabroom Land Port indang lemsatep, koba Northeast India asoshi 'gateway' ka akumtsü.

Iba project yagi region ajungalen transportation tsütsü tiptema kumdkatsütsü aser Northeast India aser Southeast Asia tsüngta tesendaktep tajungba akumtsü.

Iba den külemei senden nung adener temi trade and commerce tetsükdak makai inyaktettsü asoshi Nagaland aser Tripura tsüngta railway tesendaktep amenoktsü nüngdak ta jembia liasü.

BAN aser ATMA tsüngta iba ama senden tajung mena jembishinüba ajanga region nung rongsenketzung tsütsü tesendaktep tali adoktsü aser lungjemshitsü.

Telok anaprongi tarutsü anogotem nunga arütsü alema shishilempatsü asoshi lenmang bushitsü jembia liasü.

Peren nung SVEEP indang ICOP agiogo

Dimapur, Metsüremi/March 20 (TYO): Peren District nung March 20, 2024 nü Systematic Voters Education and Electoral Participation (SVEEP) indang Integrated Communication and Outreach Programme (ICOP) kagoo.

Iba sentong ya Central Bureau of Communication, Field Office, Kohima, Ministry of Information & Broadcasting, Government of India ajanga Peren District kubok Samziuram yimidak agia liasü.

Sentong nung tongti tesemdanger ka ama Baptist High School indang Administrator, Iheu Hegeu-i jembidang, nisung ajaki pei vote agütsütsü temeden angatettsü ashi.

Nüburtem tejakleni aotsü atema lenir tajung shiimtsü asoshi voters temi candidate kaga junga meteter vote agütsütsüla, ta lai ashi.

Sentong nung tesemdanger tongti, Numlu Pame, Chairman, Samziuram Village Council ajanga lokti tajung aser tashi tait yangertsü atema lenir shidak nem vote agütsütsü nüngdaker, ta ashi.

Shisalen sayur Relui, Head Mistress ajanga lokti dang Ethical and Informed voton, Electronic Voting Machine

(EVM), Voters Verifiable Paper Audit Trail (VVPAT), Voter's Guide aser Presiding Officers indang teinyaktsütem rateta shia liasü.

Dr Engam Pame, Regional Director, CBC, RO, Imphal ajanga lokti dang vote agütsütsü ya constitution nung agüja aliba temeden lir, ta ashi.

Junga yimsü asütsü aser nübur nem terenlok bener arutsütsü asoshi lenir tajung nüngdaker, anungji vote agütsütsü temsü alir ajaki pei vote yimya tajung nung agütsütsüla, ta pai ashi.

Election Commission of India-i election dak sendakba nung aibelener aser MCC nung aibelener indang osang agütsütsü atema mobile application "C-VIGIL: Citizens Be Vigilant" sayaogo, ta pai ashi.

Iba sentong nung ajungbena Quiz competition ka ayongzüka takok angur nem sempet den kulizüng kaket agüja liasü.

CBC FO, Kohima ajanga maneni Systematic Voters Education and Electoral Participation (SVEEP) indang Integrated Communication and Outreach Programme (ICOP) ya Peren District kubok Mhaikam, Beisumpukam, Peren Town, Tesen aser Nngam nunga agitsü.

Hospital Disaster Preparedness & Capacity Building training tenzükogo

Dimapur, Metsüremi/March 20 (TYO): Nagaland State Disaster Management Authority, Home Department ajanga Department of Health & Family Welfare aser Geo Hazards Society, India den lungjemer Naga Hospital Authority Kohima nung March 19, 2024 nü Hospital Disaster Preparedness & Capacity Building Program anogo asem atema tenzükogo.

Iba training tenzükba sentong nung Jt. CEO, NSDMA, Johnny Ruangmei-i iba training indang nükjidong indang rateta ashi aser iba sülen Managing Director NHAK, H&FW, Dr.

Sendimeren Aonok-i o tatsüka jembia liasü.

Principal Director, H&FW, Dr. Ritu Thur-ia o tatsüka jembia aser Assistant Manager (Training & Education), NSDMA, Kholou Koza Lohe-i melepzung o jembia.

Iba training nung shisalen sayur ya Dr. Hari Kumar, Pranav, Shivangi aser Tiakala Difusa nungertem alitsü. Sentong nung Deputy Director & State Nodal Officer, DM Cell Department of Health & Family Welfare, Dr. Nyan Kikon menden liasü.

Iba training ayongzükba

nükjidong ya doctor aser medical practitioner tem Nagaland nung ajungben lendong-tsüdang ajuruba mapang renema alitsü asoshi lir.

Iba den District Hospitals, CHCs aser PHCs ajak atema Hospital Disaster Management Plans adokdaktsütsü asoshi lir.

Iba training mapang Health Facilities nung menoknok mapang renema alitsüba, falling hazards, fire hazards risk identification and mitigation, Formation of Hospital Disaster Management Committee aser Incident Response System amala indang sayutsü.



Nagaland Education Mission Society, Samagra Shiksha Nagaland ajanga RCEMPA, Jotsoma nung March 20, 2024 nü "PM SHRI Schools State Level Choir Competition" ayongzüka agiba nung takok angur aser tongtipang nisungtem külemei tangokba noksa nung angur. Iba tetoktepba nung mezüngbuba jenjang Government High School Thahekhu aser tanabuba jenjang Mayangnokcha Government Higher Secondary School Mokokchung-i nguteta liasü.



March 20, 2024 nü New Delhi nung Jan Adhikar Party tongti, Pappu Yadav-i Congress nung adendang tangokba noksa nung angur. Kasa noksa nung Congress lenir Pawan Khera-a angur, Bodhbarnü Yadav-i par party Congress party den ka kuma loktepogo.

Lok Sabha election mezüngbuba shilem atema nomination tenzükogo

New Delhi, Metsüremi/ March 20 (Agencies): Lok Sabha election mezüngbuba shilem nung states aser Union Territories 21 nung Parliamentary menden 102 atema election agitsü; April 19 nü Lok Sabha election mezüngbuba shilem atema Bodhbarnü nominations tenzükogo.

Mezüngbuba shilem nung Arunachal Pradesh nung Lok Sabha menden ana, Assam nung menden pongu, Bihar nung pezü, Chhattisgarh nung ka, Madhya Pradesh nung trok, Maharashtra nung pongu, Manipur nung ana,

Meghalaya nunga ana, tenüng agütsütsü atema Mizoram nung ka, Nagaland nunga ka, Rajasthan nung 12, Sikkim nung ka, Tamil Nadu nung 39, Tripura nung ka, Uttar Pradesh nung ti, Uttarakhand nung pongu, West Bengal nung asem, Andaman and Nicobar nung ka, Jammu and Kashmir nung ka, Lakshadweep nung ka aser Puducherry nunga menden ka atema election agitsü.

Mezüngbuba shilem nung tokteptsü atema tenüng agütsütsü asoshi tatembangbuba anogoji March 27 lir. Ajisüaka Bihar nungbo benjung ka aliba agi

Nomination paper ji March 28 nü reprangshitsü saka Bihar nungbo March 30 nü reprangshitsü.

Candidate temi tenüng agienadoktsü atema tatembangbuba anogoji March 30 asütsü saka Bihar nungbo April 2 asütsü.

Lok Sabha election April 19 nü tenzüktsü, iba sülen April 26, May 7, May 13, May 20, May 25 aser June 1 anogotem nunga election agitsü aser June 4 nü vote azüngtsü.



PM Modi-i Russia Tir Putin aser Ukraine Tir Zelensky na den jembı

New Delhi, March 20

(Agencies): Bodhbarnü Ato kilonser Narendra Modi-i phone ajanga Ukraine Tir, Volodymyr Zelenskyy aser

Russia Tir, Vladimir Putin na den India den tesendaktep onüktem atema jembiba den küleme Russia aser Ukraine na tsüngda rara indang jembigo, ta kettangsertem osang ka ajanga metedaktsü.

Modi aser Zelenskyy nati India-Ukraine na tsüngda maneni lenla aika nung tesendaktep jenjang tajungba akümtsü atema jembı.

Zelensky aser Putin napronglai Ato kilonser Modi dang, parnoki India ya yimzung yanglur ka ama züngshir, anungji Lok Sabha elections temangba sülen linük semdangdaktsüner ta mepishi.

Modi-i lenir ana dang iba rara süngjemtsü atema ken o jembitsü aser yimtenren ajanga inyaktsü ayongzuka liasü, ta kasa osang ajanga metedaktsü.

Ato kilonser Modi-isa Ukraine Tir, Zelensky dang, yimzung ajanga iba ken o bentettsü atema India-i maneni inyaktsü, ta nangzük. Zelenskyy-ia India-i

Ukraine nunger nem teyari balala agütsüba atema pelaba lemsatep. Lenir anatisa maneni tongtepratepa alitsü bangjema liasü.

Russia Tir Putin den jembidang Putin-i maneni election nung takok anguba atema Modi-i pa nem tenüngsang agütsü aser India-Russia Special & Privileged Strategic Partnership maneni tashitaitba akümtsü atema lenir anati bangjem.

Lenir anatisa linük ana tsüngda tesendaktep jenjang asadang aser regional den international onüktem nung peipei tebilemba lemsatepa liasü.

Modi aser Putin natisa linük ana tsüngda lenla balala nung amalitepa inyakba jenjang asadang.

Russia-Ukraine rara indang jembidang Modi-i Putin dang ken o jembiba aser yimtenren ajanga inyakba ajanga iba mangatettep bentettsü ajungshia liasü.

Lenir anati taruba kümtem nung linük ana tsüngda Special & Privileged Strategic Partnership tajungba akümtsü atema inyaktsü bangjem aser maneni tongtepratepa alitsü lemetet.

US nung India nunger kaketshir ka sama; nisung melen sen meshir

New Delhi, March 20

(Agencies): Hopta ana shi tejaklen US nung azünger India

Cleveland nung temesepba mozü ayokertemi ner jabaso pua lir, ta metedakja liasü.

Nisungba jagisa Abdul chioktsü atema dollar sen 1,200 (India nunger senbo lakh 1 shi) agütsü aser Cleveland police ajurua nisung samaba ken o agütsü. Ajisüaka senji koma agütsü aser memetedaktsü.

Nisungba jagisa Abdul tebu dang, nenoki senji magütsüra ner jabaso indang tezüngjang ayoktsü, ta amokmerenoga.

Iba sülen tsüraburtemi US nung aliba kinüngertem nem iba osang metedaktsü aser Cleveland police ajurua nisung samaba ken o agütsü. Tsüraburtemisa shidi ajanga Chicago nung aliba Indian Council dang par jabaso kumzüksü mepishi.

Iba ama ya tang mezüng ataloker masü. Hopta asem tejaklena US nung India nunger kaketshir ka tepseter lia angu. Nisungbaji arrshi küm 20 Abhijeeth Paruchuru liasü. Pa Boston nung Engineering degree tagidak liasü.



March 20, 2024 nü Hyderabad nung CP Radhakrishnan-i (tiyong) Telangana Angh inyaktsü atema tenangzükba agiba sülen Telangana Chief Minister, Revanth Reddy-i pa nem tenüngsang agütsüdang tangokba noksa nung angur. Kasa noksa nung Telangana High Court nung Chief Justice, Alok Aradhe-a angur.



TIR YIMYIM

YIMOBILEM (EDITORIAL)

DIMAPUR YANGTEPNÜ, MARCH (METSÜREMI) 21, 2024

Meinyaktettsübo menangzüktsüla

Atangji, nangzükyonga meinyaktettsüsa tensa mapang agi nokdangtsüa akok saka kecha balaka tenokdangba timtem mali ser inyaktettsüba mapa ka inyaktsütsü nangzüker meinyaktsüba nungbo kibong nung tsürabur o tanurtem na tsüngda mesüra lokti aser yimten nung lenirtem o nübortem na tsüngda mepelatep adoker aser temulung melemtep tenzüker. Tatsüba agi, langka nüngdak ka inyaktsütsü mesüra taginüba ka agütsütsü asoshi nangzüker meinyaktsüba aser magütsüabajji nisungi nisung mezüngmeshia külakoktsüba mapa ka asütsü. Ibaji, atangji, tejashitsüka. Kasaji, tanü Nagaland anüdoklen alir kintem dang India kilo kilonser Amit Shah-i 2023 küm December 7 nü tang aruya aliba Lok sabha election agitsü anogo memetetdaktsü tsüngda Frontier Nagaland Territory jenjang ka agütsütsü nangzükbä meinyaktsüba agi Nagaland anüdoklen alir nübortem kanga mepelai lir aser iba ama linük nung tongti yimsüsü kati mezüngmeshiba atema tejashi marem parnoksasa parnok akoksatsüsa inyakba angur. Amit Shah-i nangzük saka timtembo pa masü nübortemi ajangshir. Ibaji yimsüsüri tiyazü jembiba ajanga nübortem timatemba aser linük akoksatsüsa atalokba mapa ka asütsü. Ashiko, tiyazü jembisangjibji kecha timtem aser shisabolu mali ayongayonga alitsüa akok saka pai tiyazü jembiba ajanga Nagaland tesadang ka nung government-a mali ama DC office tashi melapoktet nübortem pei mapai mao timtem takoksa ajurubaji paia tangashibo angashir asütsü imlar. Nagaland anüdoklen purtemi tang aliba Nagaland kübok mesüi parnoka state balaka kümnbajji Naga nunger mesünuba agi masü saka Kohima nungi awashi timi masüba agi parnoka parnoksasa awashitsü atema yimten balaka kümfteta anepalutsü tangatetba, tejangraba aser nükjidong lir. Aji oda, Frontier Nagaland state akümyonga mesüra Frontier Nagaland Territory akümyonga Naga nungerbo Naga nungersa asütsü, anungji iba tangatetba nung tanüngba Naga nungertemia tajung ka ataloktsü asoshi dang imlaa atar. Atangji, Nagaland anüdoklen aliritem nem parnoki aginüba yimten jenjang agütsütsü nangzükbajji yaküm küm December nung dang masü saka taoba state assembly election mapanga kasa yimsüsürtemi nangzükbä angashiogo. Ajisüaka, nangzükbä amato meinyaktsüba agi tangbo Nagaland anüdoklen alirtemi parnokbo Lok sabha election nung madentsü ta ajangajanga metedaktsüogo. Nangzükbä ama, Frontier Nagaland Territory-ji aküm nunga Lok sabha aser Rajya sabha nunga menden balaka asütsü asü mesüra tang amai dang asütsüar, tangbo ashitsü makok saka parnok tang Lok sabha election nung ya, shitakba, medenra iba mapa jagi Frontier Nagaland state jenjang balaka magütsüaka tang aliba Nagaland state yabo tiyongi ana kuma lemdanger amai asütsü. Atangji, tang election mapanga tapu tapu nangzüktsüa akok saka nangzüker meinyakertem dak shibaibo temulung alemtsü? Ano Frontier Nagaland Territory agütsütsü nangzüker magütsüba dang nungi tuluba tiyazü tenangzükba, Naga yimten tebilemtsü ya tatem kuma latettsü asoshi, yabo kilo kilonseri masü saka ato kilonseri nangzükba ken o asütsü. Asenok dangi Delhi nungi sen den tiyazü tenangzükba yoker aser asenokia tenangzükba mapatem nung masü saka sen dakji dang rangloker, anungji tenangzükbatem matalokyonga arema atar. Aji oda, asenoki asen yimten temeten aser asen lima dang nungi sen-ang temeimbam meimra, tangari asenok nem asen temeten masü saka sen ang agütsütsü. Ajisüaka, sen agi temeten meyanglur aser malir saka temeten agibo rongsen jenti ajangzüka inyaktettsü. Joko, Nagaland anüdoklen alirtema sang mesüra anüolen alirtema sang, tangari asenok dang tiyazü menangzüktsüa aser memesüshitsüa asenok tzü dang nungibo azü temelemba ta asüba amato, sen dang nungibo asen temeten taretba aser tuluba ta bilema asen yimten tangatetba nung akangakanga alitsü kanga tongtibang kümogo. Ibajiang asenok tenangzükba südi.

OLEMSABANG

Temerenshi aser Timtim

~ Imnakala (Chümoukedima)

(Yashi adok nungi...)

Item temenen aser temerenshi sako.

Lipok 20:13 Tebur kari tebur den tetsür den ama medemra tenapronglai tesempatsü benshiogo, parnok südaktsütsüla, parnok zü pei dak alitsü, tena dang masü adianu, kinunger dangi timtem, temenen, temerenshi kesa arutsü.

I timoti 1:8 Saka ozüngji timi dang benshira, aji tajung lir ta onoki metet. Saka ya bilemtettsüla, oda temeshipur asoshi ozüng meyanglu, saka ozüng melenshirtem, mazuokertem Tsüngrem metsüpürtem, temenenpur aser memeshiba aser yimsü atalartem, tebu tepsetertem, tetsü tepsetertem, nisung tepsetertem. 10 Nüktapangtartem, teburi tebur den maksü lemshirtem, nisung ayokertem, teyazü zünya züngkotem asoshi 11 aser kü ket nung yutsüba temoatsü Tsüngrem sentsüwangshi osang tajung amato atangji sayuba anema tanga langka lira, ibala asoshi ozüng yanglu. 1:19 Karbo iba tamang aser mulongsentsü tajung nungi pila nung parnok tamang rong raksaogo.

Lipok 19:1-11 nungi, Sodom lima nübur temenen yimya tesempatsü samatsütsü kotak tenyar ana aru, tena alima jabajaritsü bushia aru, tenati parnok dak züka tenük pokdaktsü.

I Tesanalokia 4:3 Kechiyong Tsüngremi mulongbaji ya lir, nenok temeshi alitsüla aser jabajariba nungi nenok pila-a alitsüla. Mathi 5:27 ya shibaisa nenoki angashiogo, nai nüktapangta tebenshi 28 saka shibaisa tetsür dak azüabonga ajidir pai la den temulong nung nükdapangtaogo Yakob 1:15 Idangji azüabongbaji mashisa kümdir temenen asor, aser kodang temenenji tain kümdir tasüba adokdaktsür.

Tsüngrem aser yimsüsürji obendanger lir

Rom 18:1-7 Tsüngrem aser yimsüsürji na atema obendanger lir. Yimsüsüri amajok nung nok mabener, aibelenerji merenshitsüsa. I Peter 2:11 Temeimbatem nenok alima nung ainertem aser amanger tem ama, tanela anema raraba shi azüabongba nungi nenok pila-a liang ta ni nenok dang mepeshir. 13 Nenoki Kibuba atema nisunger bangdak ajak küboki iang, oda chuba dang pa ajak dang temaba ama 14 aser Governortem dang mapa tamajung inyakertem merenshitsü aser mapa tajung inyakertem tenüng asangtsü atema Kibubai parnok yok ta nenoki parnoki dang tashi angang. 15 Kehiaser yamaji nenoki tajung inyakba agi tamashi nisungtem tamashibaji ola madokdaktsütsü Tsüngremi mulongba lir 16 Nenok nuji ama, aji saka nenok nüjbajji tamajung amokbangtsü mebenshi-i Tsüngrem lar ama liang.

Anitet 22:28 Nai Tsüngrem sensamasa masütsüla, mesüra nü nübur madak yimsüsür atakatem masütsüla.

Ezra 7:26 Aser shibaisa ne Tsüngrem ozüng aser chuba ozüng mebenshilir pa madak o bendang shitak agujang, tasütsü súshia, osetsüset rakzüba súshia, mesüra tepokdak ayutsü súshia.

Api 24:21 Kü chir, nai KIBUBA aser chubaji tsübuang, aser parnok ka dang danga tashi mangai teli 22 kechiyong parnok nungi lendong aoksa-a adoktsü, aser anaprong nungi tesamaba arutsüji shibai meteta ali?

Say 8:5 Shibai ozüng benshidir tamajung kecha majurutsü, aser shisha akar nisungi lenla aser lenmang meteter. 8. Mopung sota ayutsü nisung shinga daka tashi mali, mesüra tasüba anogo madak pa ain mali, rara nung shinga jenbua mali mesüra pa nem agütsüba tamajung nungi pa madokdaktsütsü.

Mati 22:13 Pa tetsüng teben alenang aser kimalen tammangdak ajungdokang, idakji tajepba aser tepu shitepba alitsü.

Kita 3:1 Yimsüsürtem aser bangdak kübok alitsü, tashi angatsü, mapa tajung ajak asoshi renema alitsü 2 aser nisung shinga indang majung mejembitsü, rarabangsen masütsü, saka anükolem asütsü, nisung ajak tsütsü ajemalu sayutsü, nai parnok dang bilemtetdakjangma. 3 Kechiyong asenoki ken mapang tamashi, tashi manga, mashilene anir oa tekülaker kuma, tapu tapu azüabonga, aser shi tepela tenzüker kuma, takuba aser mokokaji nung lia, tembar aser medemer o medemer na sempatepalar lliasü. 4 Saka tamashi tasüngdangtepba, kidong otzü, bangsentepba aser ozüng indang raratepa, item ajak nungi na pilaang, kehiaser itemi tajangzük maka aser amajok 10 Telemsateper nisung ken anaben arütsür külénbo tagizük 11 kehiaser yamala nisung mashilene aor, aser pei kuli agi tai kuma temenen menar.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züldülemba ken-o ama tazüngeri angateta agitsü mepishir



TIR YIMYIM

YIMOBILEM (EDITORIAL)

DIMAPUR YANGTEPNÜ, MARCH (METSÜREMI) 21, 2024

Meinyaktettsübo menangzüksüla

Atangji, nangzükyonga meinyaktettsüsa tensa mapang agi nokdangtsüa akok saka kecha balaka tenokdangba timtem mali ser inyaktettsüba mapa ka inyakstsü nangzüker meinyakstsüba nungbo kibong nung tsürabur o tanurtem na tsüngda mesüra lokti aser yimten nung lenirtem o nübor tem na tsüngda mepelatep adoker aser temulung melemtep tenzüker. Tatsüba agi, langka nüngdak ka inyakstsü mesüra taginüba ka agüstsü asoshi nangzüker meinyakstsüba aser magütsüabajji nisungi nisung mezüngmeshia külakokstsüba mapa ka asütsü. Ibaji, atangji, tejashitsüka. Kasaji, tanü Nagaland anüdoklen alir kintem dang India kilo kilonser Amit Shah-i 2023 küm December 7 nü tang aruya aliba Lok sabha election agitsü anogo memetetdaktsü tsüngda Frontier Nagaland Territory jenjang ka agüstsü nangzükba meinyakstsü agi Nagaland anüdoklen alir nübor tem kanga mepelai lir aser iba ama linük nung tongti yimsüsü kati mezüngmeshiba atema tejashi marem parnoksasa parnok akoksatsüsa inyakba angur. Amit Shah-i nangzük saka timtembo pa masü nübor temi ajangshir. Ibaji yimsüsüri tiyazü jembiba ajanga nübor tem timatemba aser linük akoksatsüsa atalokba mapa ka asütsü. Ashiko, tiyazü jembisangjibji kecha timtem aser shisabolu mali ayongayonga alitsüa akok saka pai tiyazü jembiba ajanga Nagaland tesadang ka nung government-a mali ama DC office tashi melapoktet nübor tem pei mapai mao timtem takoksa ajurubaji paia tangashibo angashir asütsü imlar. Nagaland anüdoklen purtemi tang aliba Nagaland kübok mesüi parnoka state balaka kümnbajji Naga nunger mesünuba agi masü saka Kohima nungi awashi timi masüba agi parnoka parnoksasa awashitsü atema yimten balaka kümpta anepalutsü tangatetba, tejangraba aser nükjidong lir. Aji oda, Frontier Nagaland state akümyonga mesüra Frontier Nagaland Territory akümyonga Naga nungerbo Naga nungersa asütsü, anungji iba tangatetba nung tanüngba Naga nungertemia tajung ka ataloktsü asoshi dang imlaa atar. Atangji, Nagaland anüdoklen alir tem nem parnoki aginüba yimten jenjang agüstsü nangzükba jiyakum küm December nung dang masü saka taoba state assembly election mapanga kasa yimsüsüremi nangzükba angashiogo. Ajisüaka, nangzükba amato meinyakstsüba agi tangbo Nagaland anüdoklen alir temi parnokbo Lok sabha election nung madentsü ta ajangajanga metedaktsüogo. Nangzükba ama, Frontier Nagaland Territory-ji aküm nunga Lok sabha aser Rajya sabha nunga menden balaka asütsü asü mesüra tang amai dang asütsüar, tangbo ashitsü makok saka parnok tang Lok sabha election nung ya, shitakba, medenra iba mapa jagi Frontier Nagaland state jenjang balaka magütsüaka tang aliba Nagaland state yabo tiyongi ana kuma lemdanger amai asütsü. Atangji, tang election mapanga tapu tapu nangzüktsüa akok saka nangzüker meinyakertem dak shibaibo temulung alemtsü? Ano Frontier Nagaland Territory agüstsü nangzüker magütsüba dang nungi tuluba tiyazü tenangzükba, Naga yimten tebilemtsü ya tatem kuma latettsü asoshi, yabo kilo kilonseri masü saka ato kilonseri nangzükba ken o asütsü. Asenok dangi Delhi nungi sen den tiyazü tenangzükba yoker aser asenokia tenangzükba mapatem nung masü saka sen dakji dang rangloker, anungji tenangzükbatem matalokyonga arema atar. Aji oda, asenoki asen yimten temeten aser asen lima dang nungi sen-ang temeimbam meimra, tangari asenok nem asen temeten masü saka sen-ang agüstsü. Ajisüaka, sen agi temeten meyanglur aser malir saka temeten agibo rongsen jenti ajangzüka inyaktettsü. Joko, Nagaland anüdoklen alir temma sang mesüra anüolen alir temma sang, tangari asenok dang tiyazü menangzüktsüa aser memesüshitsüa asenok tzü dang nungibo azü temelemba ta asüba amato, sen dang nungibo asen temeten taretba aser tuluba ta bilema asen yimten tangatetba nung akangakanga alitsü kanga tongtibang kümogo. Ibajiang asenok tenangzükba südi.

OLEMSABANG

Temerenshi aser Timtim

~ Imnakala (Chümoukedima)

(Yashi adok nungi...)

Item temenen aser temerenshi sako.

Lipok 20:13 Tebur kari tebur den tetsür den ama medemra tenapronglai tesempatsü benshiogo, parnok südakstsütsüla, parnok zü pei dak alitsü, tena dang masü adianu, kinunger dangi timtem, temenen, temerenshi kesa arutsü.

I timoti 1:8 Saka ozüngji timi dang benshira, aji tajung lir ta onoki metet. Saka ya bilemtettsüla, oda temeshipur asoshi ozüng meyanglu, saka ozüng melenshirtem, mazükertem Tsüngrem metsüpürtem, temenenpur aser memeshiba aser yimsü atalartem, tebu tepsetertem, tetsü tepsetertem, nisung tepsetertem. 10 Nüktapangtartem, teburi tebur den maksü lemshirtem, nisung ayokertem, teyazü zünya züngkotem asoshi 11 aser kü ket nung yutsüba temoatsü Tsüngrem sentsüwangshi osang tajung amato atangji sayuba anema tanga langka lira, ibala asoshi ozüng yanglu. 1:19 Karbo iba tamang aser mulongsentsü tajung nungi pila nung parnok tamang rong raksaogo.

Lipok 19:1-11 nungi, Sodom lima nübur temenen yimya tesempatsü samatsütsü kotak tenyar ana aru, tena alima jabajaritsü bushia aru, tenati parnok dak züka tenük pokdaktsü.

I Tesanalokia 4:3 Kechiyong Tsüngremi mulongbaji ya lir, nenok temeshi alitsüla aser jabajariba nungi nenok pila-a alitsüla. Mathi 5:27 ya shibaisa nenoki angashiogo, nai nüktapangta tebenshi 28 saka shibaisa tetsür dak azüabonga ajidir pai la den temulong nung nükdapangtaogo Yakob 1:15 Idangji azüabongbaji mashisa kümdir temenen asor, aser kodang temenenji tain kümdir tasüba adokdaktsü. **Tsüngrem aser yimsüsürji obendanger lir**

Rom 18:1-7 Tsüngrem aser yimsüsürji na atema obendanger lir. Yimsüsüri amajok nung nok mabener, aibelenerji merenshitsüsa. I Peter 2:11 Temeimbatem nenok alima nung ainertem aser amanger tem ama, tanela anema raraba shi azüabongba nungi nenok pila-a liang ta ni nenok dang mepeshir. 13 Nenoki Kibuba atema nisunger bangdak ajak küboki iang, oda chuba dang pa ajak dang temaba ama 14 aser Governortem dang mapa tamajung inyakertem merenshitsü aser mapa tajung inyakertem tenüng asangtsü atema Kibubai parnok yok ta nenoki parnoki dang tashi angang. 15 Kehiaser yamaji nenoki tajung inyakba agi tamashi nisungtem tamashibaji ola madokdakstsütsü Tsüngremi mulongba lir 16 Nenok nuji ama, aji saka nenok nüjbajji tamajung amokbangtsü mebenshi-i Tsüngrem lar ama liang.

Anitet 22:28 Nai Tsüngrem sensamasa masütsüla, mesüra nü nübur madak yimsüsür atakatem masütsüla.

Ezra 7:26 Aser shibaisa ne Tsüngrem ozüng aser chuba ozüng mebenshilir pa madak o bendang shitak agujang, tasütsü sushia, osetsüset rakzüba sushia, mesüra tepokdak ayutsü sushia.

Api 24:21 Kü chir, nai KIBUBA aser chubaji tsübuang, aser parnok ka dang danga tashi mangai teli 22 kechiyong parnok nungi lendong aoksa-a adoktsü, aser anaprong nungi tesamaba arutsüji shibai meteta ali?

Say 8:5 Shibai ozüng benshidir tamajung kecha majurutsü, aser shisa akar nisungi lenla aser lenmang meteter. 8. Mopung sota ayutsü nisung shinga daka tashi mali, mesüra tasüba anogo madak pa ain mali, rara nung shinga jenbua mali mesüra pa nem agütsüba tamajung nungi pa madokdakstsütsü.

Mati 22:13 Pa tetsüng teben alenang aser kimalen tammangdak ajungdokang, idakji tajepba aser tepu shitepba alitsü.

Kita 3:1 Yimsüsürtem aser bangdak kübok alitsü, tashi angatsü, mapa tajung ajak asoshi renema alitsü 2 aser nisung shinga indang majung mejembitsü, rarabangsen masütsü, saka anükolem asütsü, nisung ajak tsütsü ajemalu sayutsü, nai parnok dang bilemtetdakjangma. 3 Kechiyong asenoki ken mapang tamashi, tashi manga, mashilene anir oa tekülaker kuma, tapu tapu azüabonga, aser shi tepela tenzüker kuma, takuba aser mokokaji nung lia, tembar aser medemer o medemer na sempatepalar lliasü. 4 Saka tamashi tasüngdangtepba, kidong otzü, bangsentepba aser ozüng indang raratepa, item ajak nungi na pilaang, kehiaser itemi tajangzük maka aser amajok 10 Telemsateper nisung ken anaben arütsür külénbo tagizük 11 kehiaser yamala nisung mashilene aor, aser pei kuli agi tai kuma temenen menar.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züldülemba ken-o ama tazünge ri angateta agitsü mepishir

Myanmar kubok Kachin state nung Baptist pastor ka khaset



Myanmar kubok Kachin State nung Baptist pastor, Nammye Hkun Jaw Li noksa nung angur.

March 20, 2024: March 18,

2024 nü Myanmar kubok Kachin state nung nisung kari Baptist pastor ka khasetogo, ajisüaka pastor khasetertemji mejangja.

Nisung asemi arrshi küm 47, Nammye Hkun Jaw Li khaset. Pa ya Kachin Baptist Convention (KBC) nungi pastor liasü. Mogaung jila nung pa indang computer dukan nung pa lia mejangaba nisung kar arur pa khaset.

Nam Ma Tee yimdak nungi par kinünger kati, "Parnoki pa dak tebok nung injang anaben khaloktsü, saka pa masüba agi tekolak nunga injang khaloktsü," ta metedaktsü.

Pastor Nammye ya Kachin state nung sepaitem anema longkak aitertem lenir ka liasü. Pa KBC nunga executive liasü aser temesepba mozü anema tentetba Pat Jasan organization nunga pa densema liasü.

Pastor Nammye-i pa kinüngtsü den tanur asem

toktsür süogo.

Par kibong aser yimdakirtemi ochi temeden akhanger, ajisüaka parnoki pastor khasetba atema

Organization kecha nem-a tai metongloksü, kechiyong pa khaseremji parnoki mejangja.

Khristan nütsüng aika aliba Kachin state nung lisopur telok balalai sepai yimsüuba anema rarar. Myanmar nung sepaitemi democracy sorkar atsüngdoka yimsüuba tenzükba sülen lisopur telok balalai longkak aita sepaitem anema rarar. Iba rara ajanga nisung noklang aika süogo aser meyirjang aika jensiogo.

Nütsüng million 1.7 shi aliba Kachin state nung nütsüng shilem 34 bo Khristantem lir.

Kachin state nung sepaitemi Tenla ki aika raksatsüogo. Arogo organizations aser Khristan yimtsüngtemi sepai yimsüuba anema nokdaker, ta aija sepaitemi Khristantem

2022 küm December ita

nunga sepaitemi Baptist pastor, Hkalam Samson pua liasü. Pastor Samson-i Kachin Independence Army (KIA) den tesendaktep ayur, ta tai tongloka pa küm trok tepuokdak ayutsü obendang agütsüogo.

Tawa Kachin lisopur teloktemi sepaitem madak takok ngua sepaitem aika meindokogo. KIA züngsemtemi sepai camp 14 amak aser missile amshia regional airport ka maakdokogo.

Ibaji mangyanga February ita nung sepaitemi civilian amak, ki aika rongdoktsü aser yimtsüngtem nung bomb poklokja liasü.

Kachin state kubok jila trok nungi nisung 10,000 dak tema jensiogo.

March 1 nungi March 15 tashi nung sepaitemi anünglen nungi amakdang nisung 11 süogo, ta Assistance Association for Political Prisoners-i sangdong ka ajanga metedaktsü.

akhi yimsü benshirtem lir," ta metedaktsü.

"Raigarh nung Korva tribal nütsüng 60 shi dang lir aser parnok teimbaka arem nung alir. Parnok aliba tesem tonga aotsüji kanga tasak," ta paisa metedaktsü.

Hindu teloktemi Khristan 200-i Hindu yimsü tanaben agizük, ta sangdongbajhi shidak ta ashitsüa parnok ket nung kuli mali, ta paisa metedaktsü.

"Taruba anogotem nunga item ama tiyazü osang aika angashitsü ta ni bilemer, kechiyong linük nung general elections agitsü mapang ana nung lir," ta pai ashi.

RSS-i parnok indang organization balala ajanga tribal Khristantem Hindu yimsü dangi meyipdaktsü atema asalentong yanglur inyaker.

Bharatiya Adivasi Sangamam (Indian indigenous people's forum) nung executive züngsem, Shanti

Beck-i, Hindu teloktemi tribal nisungtem Hindu yimsü dangi meyip, ta osang aiben sangdongogo, ajisüaka parnoki kulibo magütsüteter, ta ashi.

Yaküm Chhattisgarh assembly election nung BJP-i takok ngua sorkar akumba sülen taküm March 3 nü state assembly nung anti-conversion bill tesashiba ka benoka lir.

Iba ozüng tasenba kubok tamangba yimsü meyiptü atema anogo 60 jelia sorkar ketcadangsertem nem metedaktsü. Tang aliba Chhattisgarh Freedom of Religion Act 2003 kubokbo tamangba yimsü meyiptü atema anogo 30 dang jelia ketcadangsertem nem metedaktsü.

Iba ozüng kubok tashiyim amshia, mesüzüka, kiyimba ajanga mesüra ashikülak ajanga tamangba yimsü meyipdaktsü nung aibelenertem küm 10 tashi tepuokdak ayutsü.

ANOGO ABEN TSÜNGREM DEN

Atangji nüchi

"Nüchiba asoshi Khristai asenok nüchi kümdaktsü. Anungji akang akanga nokdakang, aser tanaben alar tapuba süngra nung tapu".

Galatia 5: 1.

Alarji tashi taiter ket nung tashi maiter taküm tia mejungi akumba lir, aser iba temang aser tanelan anaprongla asoshi tamajung tia lir. Iba lima nung ajak temenen lar aso. Iba süngraji yimya balala nung jungkai adok. Israel nunger Ijip nung asortemji alar talenba kubok aso. Tsüngrerni Abraham dang nangzükba tenangzükba dak alema parnok kümzuktsü tanga lenmang kecha mali asü.

Israel nunger alangzüktsü asoshi Kibuba ajanga renemtsü. San chanu ka tepseta kikümdong nung iba züji mezü. Shirnoki iba mapa tashi anga inyak parnok Ijip nungi Kanani ao. Aji kidangi aoba inyakyim nung aikati nemnem aser Ijipi meyipa aotsü bilem. Tenemnemertemi Ijipji taküm tajung alidak ama bilem. Kanan lenmang nung meranga jajaba dang nungi alar tia-jiang tajungba ama angu. Asenok asoshi lendongji, tejen takümji Khrista nung nüchi anguba dang nungi tajungba ama bilemer. Aiben alimai mesüra temeneni atidanger aser iba sang nung pudaktsür. "Khristai asenok nüchi kümdaktsü." Iba nüchi temoatsü aser tepela nung taküm liang. Ne nüchi nung temulungjang aser tanelan akanga nokdakang.

Oba, ni nüchi kümdaktsüba asoshi Ne tenüng asanger.

Scottish Episcopal Arogoi tang mezüng tetsür ka Secretary General shim



March 20, 2024: Scottish ngua Arogo indaktsüsü ni

Epicopal Arogoi tang mezüng tetsür ka Secretary General shimogo; Dr Dee Bird ya 2020 nungi lir saka 1997 küm la Scotland-i ao. Edinburgh Napier Students' Association nung CEO inyaker.

1983 küm Scottish Episcopal Arogoi General Synod Office (GSO) tentetba sülen tang mezüng secretary general menden atema tetsür shimmer.

Secretary General ka ama Dr Bird-i GSO nung chief executive officer ama tenzüktsü. GSO yagi General Synod indang mission mapa nungitba den külemi Scottish Episcopal Church den Arogo ketcadangsübare nung yariteper.

Dr Bird-i sangdong ka ajanga, "Scottish Episcopal Church nung züngsem ka ama, iba menden atema ni shimba ya ni asoshi maongka aser akhümket. Province nung aliba partners, Diocese tenet aser local Arogotem amalitepa inyakba ajanga maongka balala

yongyar," ta metedaktsü.

Dr Bird ya New Jersey nungi lir saka 1997 küm la

Scotland-i ao. Edinburgh

Napier Students' Association nung aliba mapang nung la

leniba nung asalentong yanglue liasü. Edinburg aser alima tesem balala nung iba Association-i kakethir 19,000 dak tema tenzüker.

Dr Bird ya Scottish Funding Council for Further and Higher Education (SFC) nunga küm 8 tashi Assistant Director inyaka liasü.

Dr Bird-i University of Glasgow nungi Literature, Theology & Arts Master's degree aser PhD angu aser Philadelphia nung aliba Palmer Seminary nung Master of Divinity renema liasü.

Dr Bird-i taküm August 1 nü mapa tasenba (Secretary General) agizüktsü aser June ita nung Edinburg nung ayongzüka aliba General Synod nung adentsü.

Papua New Guinea tzümetüsüng, anentsüh nung nisung 23 asü



Port Moresby, Metsüremi/March 20 (Agencies): Papua New Guinea indang highland aser tzükumlen tzünglu kanga sashia arua tzüsem adoka lenmang, nisung aliba ki aser atsuki metenzüka aoba nung nisung 23 shi asü.

Chimbu province nung anentsüh aluba nung asürtem rongnung tetsü ka aser lar tanur ka dena lir, ta National Disaster Centre indang acting director Lusete Man-i osangbener dang ashi.

"Tesem balala asem nung anentsüh kanga sashia alua nisung 23 arem," ta Man-i Hombarnü ashi.

"Yangi tang tashi tzünglu kanga sashia arur, anentsüh alur aser ayong tem tzümetüsüng agi mubanga ayimer aser tenemlen teraksa jenti agütsü."

Chimbu south tsütsü Gulf province nunga tzükum nung alirtem tzümetüsüng agi timtemtar.

Tzüsem tulu adoka tzükum nung aliba Lese Kavora yimtsüng munanga atsuki

raksatsü aser tzü tajung ayimba tesem menentsü, ta Papua New Guinea indang public broadcaster National Broadcasting Corporation (NBC) ajanga Bodhbarnü ashi.

Tzü-mopung melenshiba ajanga iba tesem nung tzümetüsüng tulu adoka yimtsüng mubangba tang mezung ataloker masü, aser nüburtemi yimtsüng melenshitsu jembia lir ta ashi.

Enga province nunga tzümetüsüng kanga sashia adoka lir aser yangji alirtem nem chiyongtsü agütsür, ta Wapenamanda nung lenir Aquila Kunzie-i ashi.

"Wapenamanda district nung tzünglu tanen makai aruba ajanga ayong tem mubang," ta Kunzie-i ashi.

Tetsür aser tanur 100 dak tema par yimtsüng nung jenoka lir ta pai ashi.

Parnok nisung aika arua alinung onok breakfast aser lunch mechiteter, anungji anogo nung khen dang chiyonger, ta ashi. "Teyari

meshitsü lenmang mali."

Alima nung tzü-mopung melenshiba aser alimar lendong balala agi kongshitsü temelatiba linüktem rongnung Papua New Guinea ya jenjang 16 buba nung lir ta 2022 World Risk Index ajanga ashir.

The Amazon aser Congo Basin rainforest sülen alima nung rainforest tulutiba jenjang tasembuba Papua New Guinea indang tenem-tekong nung lir.

Saka palm oil tsünütü atema süng atsüngba aser bendanger company balala arua süngpak arangba ajanga arem-min tesem tuluka samaogo.

Alima nung palm oil bendang lima dang ayokba linüktem rongnung Papua New Guinea ya jenjang pongu buba nung lir aser 2022 küm timba India, Netherlands, United Kingdom aser Malaysia dangi yoka liasü.

Rainforest mürekba ajanga tzü-mopung melendaktsür aser lipajen raksaja tzümetüsüng aser anentsüh tamajungba akumer.

arrtsü nung aliba Balochistan kübok Panjgur jila amakba sülen Pakistan-i iba telangzüba agüja liasü.

2021 küm Taliban-i Afghanistan nung sorkar atsüngba aser 2022 küm November ita sorkar den ceasefire yanglur aliba nungi Tehreek-i-Taliban Pakistan telungpur telok atsüngiba sülen Pakistan nung aser talisa KP o Balochistan na nung kiralongrar inyakyim khenyongi magizüksü tali kümogo.

South Asian Terrorism Portal-i ashiba agi, Pakistan nung taoba küm kiralongrar dak sendakba tatalokba 527 ajangshiogo, koba 2015 küm sülen timtiba liasü. 2023 küm civilian 400 shi aser sepai 500 dak tema tepsetogo.

KP aser Balochistan province ya azütokshi lendong atalokba teyongtsü liasü aser lendong shilem 90 bo iba province ana nung ataloka liasü.

Pakistan-i tesem balala amakba sülen Taliban-i-a telangzüba agüja mortars densema prangbong tulu amshia arrtsü adener Kurram aser North Waziristan nung Pakistan nunger sepaitem maka liasü.

Taküm küm tetenzüklen Pakistan-i Iran nunga tesem kar makogo. Iran-i Pakistan nung amendaker aliba Jaish al-Adl telungpur telok dak rangloker

Hombar anepdang züngia lia Pakistan-i itangiter osang dak ajemdaker kiralongrar anema jenjang agiba nung shilem ka ama Afghanistan kübok Khost

South Korea indang rongka mekübok; nisung 8 süogo

Seoul, Metsüremi/March 20 (Agencies): South Korea indang wako songer aliba rong ka Japan tzüyim nung mekübokba sülen nisung ti süogo aser ana samar bushidar, ta ketdangsürtem metedaktsü.

Keoyoung Sun rong nung crew members 11 liasü aser iba rong ya Bodhbarnü Mutsure asetkong anasa meküboka liasü, koba linük yimtiba Tokyo nungi km 1,000 shi pilar lir.

Mezungbo coastguard temi, parnoki member crew 11 nungi tekubo kümzükogo ta metedaktsü. Rong nung mena alirtem rongnung rongnir densema South Korea nunger ana, Indonesia nunger ti aser China nunger ka densema liasü.

Coastguard-isa, Indonesia nunger ka taküm lir aser nisung kabu süogo, ta metedaktsü. Taoba mapang ketdangsürtem coast guard temi nguteter aliba nisung teku prongla kechi tia nung lir aji mejangja ta shia liasü.

Samar aliba nisung ana maneni bushidar.

Bodhbarnü senden ka amenba mapang South Korea nunger ketdangsürtem rong mekübokba indang sensaksemogo. Senden nung Vice Foreign Minister Kang Insun-i ketdangsürtem dang tekümzükba mapren atema aser South Korea nunger crew member kinungertem nem teyari agütsütsü asoshi takokba tashi jenjang agitsü tetuyuba agütsüogo, ta Foreign Ministry-i ashi.

Iba rong ya Japan kübok Himeji rongnendak nungi South Korea kübok Ulsan-i oya liasü, ta NHK-i ashi. Rong kodasür meküpok iba indang osang tejangja osang agütsüba mapang tashi nung mejangjai liasü.

Iba rong nung adhesive, paint aser polish nung amshiba acrylic acid ton 980 bener liasü. Tang tashi nungbo iba acid yangshia aoba osangbo kecha mali saka tia maka iba acid yangshia ao tenzük nungbo tzümetüsüng kümzükä ayutsü atema ketdangsürtemi jenjang tapet agidär.

Küm ka sülen Vietnam tiri mapa yutsüogo

Hanoi, Metsüremi/March 20 (Agencies): Vietnam Tir Vo Van Thuong-i mapa yutsütsü tezüluba nung agütsüba Vietnamese Communist Party ajanga March 20 nung agizükogo ta sorkari sangdong ka nung ashi, anungji bendangeri linük nung temulung lema rongsen indokba nung timtem ajurutsü.

Thuong-i party ozüng nung aibelen aser itemji ajanga public opinion nung kanga mejungi kongshia Party, State aser pa tenüng menük, ta sorkari sangdong nung ashi.

Communist Party-i yimsü asüba Vietnam nung telemetba balala agiba telok, Central Party Committee ajanga election agir küm ka shi nung Thuong indang resignation agizükogo.

Vietnam nung tir ya tenüng atema shimbä amai lir, saka iba Southeast Asian linük nung political position temaba pezü rongnung ka lir.

Committee senden amenba sülen Vietnam parliament nung Brehostibarnü senden balaka amentsü lir aser yangji deputy temi party telemetba agizüktsü imlar.

Ochimashi mapa jenti inyakba anendaktsütsü mechii

anti-bribery campaign ka tenzükä lenirtem melentepa liasü, saka aikati ibai party telungzük nung meputep aliba ajanga lir ta ashir.

Küm aika tejakdang ochimashi mapa inyakba asoshi Quang Ngai Province indang taoba lenir puogo ta Vietnam police temi sangdonger anogo ishika lira rishi küm 53 tain Thuong ya mapa nungi anen.

Thuong ya General Secretary Nguyen Phu Trong den tesendaktep tajung lir ama aikati züngshia liasü, shiba Vietnam nung tashi tulutiba aliba lenir aser anti-graft campaign ya pai anir tenzük.

Taoba küm taoba tir Nguyen Xuan Phuc kübok ketdangsürtemi aibelen aser mapa meshidak inyak ta pa tenüng asenba sülen Nguyen Xuan Phuc ya tir menden nungi alu aser ita ka ser tesadang lir pa melena Thuong shima liasü.

Tir tasen ka asoshi tekeraba nung election agira tang Vietnam nung yimtenren tsütsü mepetmesü ya bentettsü, saka tanen makai lenirtem melentepba ajanga shishilempaba tsütsü timtem ajurutsü, shirnok bendanger investment nung kanga metaloka alir.

SANGDONGER

Mrs. Chubanaro (Narola Lisen) kinungbo tenüng I. Nukshi Longkumer, yim Molungimsen, ajanga kinunger li temelaba mellii sen melen züngzüktepa ayuba meteta aruogo. Kinunger liji la jurila meyong masü ta jangjatsür aser iba ama mapa ya ozüng anema inyakba ashikulak mapa ka lir. Iba sangdong ajanga kinunger shingaia la nem sen yong ali züngzüktepa ayutsü kuli agüja mali ta jangjatsür. Tarutsü nung shiri la den iba ama mapa inyakdir yangji kinunger tena mali. Iba den ano lai kar den tanga aputsüya lira aji ozü memetet aser ibaji ozü khuret masü ta metedaktsür.

Masetshilong Longkumer

Chubaonen Longkumer

Alemyanger Longkumer

3buba North East Games: Nagaland team maneni temaba jenjang nung lir



Dimapur, Metsüremi/

March 20 (TYO): 3buba jenjang nung Manipur lir, North East Games 2024 parnoki gold 12, silver 9 aser tanabuba anogo Nagaland team nungi asayartem maneni kanga junga asaya parnoki ajak senteper medal 39 nguogo. Nagaland team-i tang tashi nung Gold 18, silver 8 aser Bronze medal 13 ngua lir aser medal tally nung parnoki maneni temaba 8 densema lir.

Asayamung nung asaya

Nagaland sülen tanabuba jenjang nung Manipur lir, parnoki gold 12, silver 9 aser bronze medal 13 ngua ajak senteper medal 34 ngua lir. Kasa mapang nung Assam team-i ajak senteper medal 35 ngua parnok tasembuba jenjang nung lir. Parnoki anguba medal tem rongnung gold 11, silver 16 aser bronze

balala asayayonga aoba mapang Manipur-i Nagaland ajatettsü majatettsü mesüra Assam-i mimlai asaya kokatoktsü asü ta terprangertem yongyaseta atepdar.

3buba North East Games ya kanga jangradema asayadar, kong NE kubok state balala nungi sempet tajung aketba asayartem adenshia takok asoshi kanga meranga toktepdar.

	NAGALAND	18	08	13	39
	MANIPUR	12	09	13	34
	ASSAM	11	16	08	35
	MEGHALAYA	02	03	09	14
	MIZORAM	02	00	01	03
	ARUNACHAL PRADESH	01	03	08	12
	SIKKIM	01	02	02	05
	TRIPURA	00	04	03	07

BWF Rankings: Lakshya Sen 13bubai tuogo

Metsüremi/March 20, 2024

(Agencies): India nunger badminton asayar Lakshya Sen Mongolbarnü sayaba BWF rankings nung jenjang pongu tejakdangi tua tang 13buba nung lir. All England Championships nung semifinal tonga asayaba süleén pai iba jenjang ajangzüktetogo.

Almora nungi arishi küm 22 tain asayar ya Birmingham nung semifinal tonga asaya aser iba ajanga pa tang 13buba nung lir. Hopta ka tejakdang pa Olympic Games Qualification nung 15buba nung liasü.

April ita tatem tashi nung top 16 nung aliba asayartem Olympics nung asayatsü atema maongka angutsü.

Paris Olympics atema Qualification rankings nung HS

Prannoy 9buba nung lir aser Sen-a iba asayamung nung shilem agitsü maongka ngutettsü imlar.

Sen-i 2022 küm November ita world number six tonga asaya koba pa indang career nung jenjang tajungtiba liasü, ajisüaka taoba küm April ita pa No.25bubai asepzüka alu. Iba sülen August ita tashi nung pa 11buba tashi atu saka taküm küm tetenzüklen asayamung aika nung kanga kara tsükatokba sülen pa 20bubai lula liasü.

Maneni pa Malaysia aser India Open densema asayamung aika nung mezüngbuba round nung tsükatokba sülen Olympics atema qualify asütsü asoshi timla makai aküm, ajisüaka

French Open aser All England na nung semifinal tonga asayaba sülen pa jenjang junga kümogo.

India nunger asayartem rongnung World Championships aser Asian Games bronze medallist HS Prannoy tekububa nung lir aser pa sülen Kidambi Srikanth (27th) aser Priyanshu Rajawat (32nd) na lir.

Tetsür kija asaya nung PV Sindhu tang 11buba nung lir.

India nunger tebur tarep asayar Satwiksairaj Rankireddy aser Chirag Shetty na maneni temaba jenjang nung lir aser tetsür tarep asayar Ashwini Ponnappa aser Tanisha Crasto na 20buba aser Treesa Jolly o Gayatri Gopichand na 26buba nung lir.

5th Mokokchung Inter-Ward Football Tournament 2024 osang

Artang ward final-i igo, tanü Arkong o Sungkomen 2nd semifinal asayatsü

Mokokchung, Metsüremi/

March 20 (TYO): March 19 nü 5buba Mokokchung Inter-Ward Football Tournament mezüng semifinal asaya Artang Ward o Mongsenbai Ward tsüngda yangi Imkongmeren Sports Complex, Mokokchung nung asayaba, Artang-i penalty nung goal 7-6 agi Mongsenbai pur madak takok tulu nguteta final asayatsü jenjang saka yangjia shingaia takokba goal ji magütsütet. Anungji,

Iba sülenji mapang shia telok anapronglai goal yoktsü maongka nguaka, kataia goal magütsütet lemzüksüba mapangji tembang. Aji sûr, mapang talila (extra time) minute ter-er apulokja saitep saka yangjia shingaia takokba goal ji magütsütet. Anungji, asayamung temzüngi melaba ama penalty metsütep. Penalty metsütep dangja goal trok-rok tashibo kasasa atu aser tenet-net metsüteba mapang Artang goalkeeper-i ball ka nokdangteta iba asaya parnoki takok angu. Tanü asayaji final match repranger amato telok anaprongla sakuku tajung tesa liasü.

March 21, 2024 Brihostibarnü tanabuba semifinal asayaji nikong 2:00 ako nungi tenzüka kasa tesem nung Arkong Ward o Sungkomen Ward na asayatsü. Asayamung tepiyong repranga arunung, ward anaprongla league match nungi quarter tashi kanga junga takok ngua asaya-a atuba angur. Anungji, iba asaya ya shibai akoktsüar shingaia meshiteter, aji oda, shibai akoktsüar mapangi dang bener arutsütsü.

BILEMDANGANG

"Anepdang tebilemdangba tajung ka ajanga nü anogo melenshitsütsü."

Russia & Belarus nunger asayartem Paris Olympics lapokba sentong nung shilem magidaktsütsü

Metsüremi/March 20,

2024 (Agencies): Russia aser Belarus nunger asayartem Paris Olympics lapokba sentong nung shilem magidaktsütsü ta IOC-i IOC-ia iba telemtetba agiogo. Mongolbarnü metedaktsüogo.

July 26 nü asayamung lapokba sentong agiba mapang asayar meyirejang aika taoba mapang ama stadium telung nung team tem parade asüba ama masü saka Seine ayong nung rong nung mener mile aika Eiffel Tower leni aotsü.

International Olympic Committee-i ashiba agi, Russia aser Belarus nungi asayartem shirnok Olympics nung neutrals ama tokteptsü atema temelaba agütsüogo, parnoki iba sentong ya ayongküm nungi reprangettsü.

International Paralympic Committee-i hopta ana

tejakdang linük ana nungi asayar nem August 28 nü asayamung lapokba sentong nung shilem magidaktsütsü atema tenokdangba agütsüba sülen IOC-ia iba telemtetba agiogo.

Ukraine amak dak sendakba nung Russia aser Belarus nunger asayartem Olympics nung team asaya nung shilem magidaktsütsü aser IOC-i iba linük ana nungi asayartem nem neutral jenjang agütsütsü atema jenjang ana laateta toktsüogo. Item asayartem ya parnok asayatsü aliba asaya achaayangba lokti tentettemi agizüktüslü aser iba sülen IOC-i shimba review panel-i agizüktüslü.

Neutral asayartem Ukraine amakba yimjak nung pusema malitsüla mesüra parnok ya military mesüra state security agencies tem amshitsü atema wako jade green sentsüh agi melentsüba sangdongogo aser iba den naaklo kena ka ojang medeni temloktsütsü.

Maneni IOC-i, medal agütsüba sentong nung neutral tem amshitsü atema wako jade green sentsüh agi melentsüba sangdongogo aser iba den naaklo kena ka ojang medeni temloktsütsü.